

四庫全書

子部

欽定四庫全書

子部

長物志

目錄
卷一至六

詳校官中書臣潘有為

員外郎臣牛稔文覆勘

覆校官中書臣呂雲棟

校對官原任典簿臣郭祚熾

繕錄監生臣金國豐

欽定四庫全書

子部十

長物志目錄

雜家類四
雜品之屬

卷一

室廬

卷二

花木

卷三

水石

卷四

禽魚

卷五

書畫

卷六

几榻

卷七

器具

卷八

位置

卷九

衣飾

卷十

舟車

卷十一

蔬果

卷十二

香茗

臣等謹按長物志十二卷明文震亨撰震亨

字啓美長洲人崇禎中官武英殿中書舍人以善琴供奉是編分室廬花木水石禽魚書畫几榻器具位置衣飾舟車蔬果香茗十二類其曰長物蓋取世說中王恭語也所論皆閒適游戲之事纖悉畢具明季山人墨客多

傳是術著書問世累牘盈篇大抵皆瑣細不足錄而震亨家世以書畫擅名耳濡目染較他家稍為雅馴其言收藏賞鑑諸法亦頗有條理蓋本於趙希鵠洞天清錄董其昌筠軒清悶錄之類而畧變其體例其源亦出於宋人故存之以備禊家之一種焉乾隆四十二年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

長物志卷一

明文震亨撰

室廬

居山水間者為上村居次之郊居又次之吾儕縱不能
栖巖止谷追綺園之踪而混跡塵市要須門庭雅潔室
廬清靚亭臺具曠士之懷齋閣有幽人之致又當種佳
木怪擇陳金石圖書令居之者忘老寓之者忘歸遊之
者忘倦蘊隆則颯然而寒凜冽則煦然而燠若徒侈土

木尚丹堊真同桎梏樊檻而已志室廬第一

門

用木為格以湘妃竹橫斜釘之或四或二不可用六兩
傍用板為春帖必隨意取唐聯佳者刻於上若用石相
必須板扉石用方厚渾朴庶不涉俗門環得古青綠蚰
蝶獸面或天鷄饕餮之屬釘於上為佳不則用紫銅或
精鐵如舊式鑄成亦可黃白銅俱不可用也漆惟朱紫黑
三色餘不可用

階

自三級以至十級愈高愈古須以文石剝成種繡墩或草花數莖於內枝葉紛披映階傍砌以太湖石疊成者曰澀浪其制更奇然不易就複室須內高於外取頑石具苔班者嵌之方有巖阿之致

牕

用木為粗格中設細條三眼眼方二寸不可過大牕下填板尺許佛樓禪室間用菱花及象眼者牕忌用六或

二或三或四隨宜用之室高上可用橫牕一扇下用低
檻承之俱釘明瓦或以紙糊不可用絳素紗及梅花簾
冬月欲承日製大眼風牕眼竟尺許中以線經其上庶
紙不為風雪所破其制亦雅然僅可用之小齋丈室漆
用金漆或朱黑二色雕花綵漆俱不可用

欄干

石欄最古第近於琳宮梵宇及人家冢墓傍池或可用
然不如用石蓮柱二木欄為雅柱不可過高亦不可雕

鳥獸形亭榭廊廡可用朱欄及鵝頸承坐堂中須以巨木雕如石欄而空其中頂用柿頂朱飾中用荷葉寶瓶綠飾卅字者宜閨閣中不甚古雅取畫圖中有可用者以意成之可也三橫木最便第太朴不可多用更須每楹一扇不可中豎一木分為二三若齋中則竟不必用矣

照壁

得文木如豆瓣楠之類為之華而復雅不則竟用素染

或金漆亦可青紫及灑金描畫俱所最忌亦不可用六
堂中可用一帶齋中則止中楹用之有以夾紗牕或細
格代之者俱稱俗品

堂

堂之製宜宏敞精麗前後須層軒廣庭廊廡俱可容一
席四壁用細磚砌者佳不則竟用粉壁梁用毳門高廣
相稱層階俱以文石為之小堂可不設牕檻

山齋

宜明淨不可太敞明淨可爽心神太敞則費目力或傍
簷置牕檻或由廊以入俱隨地所宜中庭亦須稍廣可
種花木列盆景夏日去北扉前後洞空庭際沃以飯瀝
雨漬苔生綠褥可愛遶砌可種翠芸草今遍茂則青蔥
欲浮前垣宜矮有取薜荔根瘞牆下灑魚腥水於牆上
以引蔓者雖有幽致然不如粉壁為佳

丈室

丈室宜隆冬寒夜略敞北地暖房之製中可置卧榻及

禪椅之屬前庭須廣以承日色畱西牕以受斜陽不必開北牖也

佛堂

築基高五尺餘列級而上前為小軒及左右俱設歡門後通三楹供佛庭中以石子砌地列幡幢之屬另建一門後為小室可置臥榻

橋

廣池巨浸須用文石為橋雕鏤雲物極其精工不可入

俗小溪曲澗用石子砌者佳四傍可種繡墩艸板橋須
三折一木為欄忌平板作朱卍字欄有以太湖石為之
亦俗石橋忌三環板橋忌四方磬折尤忌橋上置亭子

茶寮

構一斗室相傍山齋內設茶具教一童專主茶役以供
長日清談寒宵兀坐幽人首務不可少廢者

琴室

古人有於平屋中埋一缸缸懸銅鐘以發琴聲者然不

如層樓之下蓋上有板則聲不散下空曠則聲透徹或
於喬松修竹岩洞石室之下地清境絕更為雅稱耳

浴室

前後二室以牆隔之前砌鐵鍋後燃薪以俟更須密室
不為風寒所侵近牆鑿井具轆轤為竅引水以入後為
溝引水以出澡具巾悅咸具其中

街徑庭除

馳道廣庭以武康石皮砌者最華整花間坵側以石子

砌成或以碎瓦片斜砌者雨久生苔自然古色寧必金錢作埒乃稱勝地哉

樓閣

樓閣作房間者須回環窈窕供登眺者須軒敞弘麗藏書畫者須爽塏高深此其大畧也樓作四面牕者前楹用牕後及兩傍用板閣作方樣者四面一式樓前忌有露臺捲蓬樓板忌用磚鋪蓋旣名樓閣必有定式若復鋪磚與平屋何異高閣作三層者最俗樓下柱稍高上

可設平頂

臺

築臺忌六角隨地大小為之若築於土岡之上四周用粗木作朱闌亦雅

海論

忌用承塵俗所稱天花板是也此僅可用之解宇中地屏則間可用之暖室不可加簾或用氈毼為地衣亦然總不如細磚之雅南方卑濕空鋪最宜畧多費耳室

忌五柱忌有兩廂前後堂相承忌工字體亦以近官解
也退居則間可用忌傍無避弄庭較屋東偏稍廣則西
日不逼忌長而狹忌矮而寬亭忌上銳下狹忌小六角
忌用葫蘆頂忌以茆蓋忌如鐘鼓及城樓式樓梯須從
後影壁上忌置兩傍碑者作數曲更雅臨水亭榭可用
藍絹為幔以蔽日色紫絹為帳以蔽風雪外此俱不可
用尤忌用布以類酒舩及市藥設帳也小室忌中隔若
有北牕者則分為二室忌紙糊忌作雪洞此與混堂無

異而俗子絕好之俱不可解忌為卍字牕傍填板忌牆
角畫楹及花鳥古人最重題壁今即使顧陸點染鍾王
濡筆俱不如素壁為佳忌長廊一式或更互其製庶不
入俗忌竹木屏及竹籬之屬忌黃白銅為屈戍庭際不
可鋪細方磚為承露臺則可忌兩楹而中置一梁上設
叉手笆此皆元製而不甚雅忌用板隔隔必以磚忌梁
椽畫羅紋及金方勝如古屋歲久木色已舊未免繪飾
必須高手為之凡入門處必小委曲忌太直齋必三楹

僑更作一室可置臥榻面北小庭不可太廣以北風甚厲也忌中楹設欄楯如今拔步牀式忌穴壁為櫥忌以瓦為牆有作金錢梅花式者此俱當付之一擊又鴟吻好望其名最古今所用者不知何物須如古式為之否則亦倣畫中室宇之製簷瓦不可用粉刷得巨楹欄擘為承溜最雅否則用竹不可用木及錫忌有捲棚此官府設以聽兩造者於人家不知何用忌用梅花簷堂簾惟溫州湘竹者佳忌中有花如繡補忌有字如壽山福

海之類總之隨方制象各有所宜寧古無時寧朴無巧
寧儉無俗至於蕭疎雅潔又本性生非強作解事者所
得輕議矣

長物志卷一

欽定四庫全書

長物志卷二

明文震亨撰

花木

弄花一歲看花十日故幃箔映蔽鈴索護持非徒富貴
容也第繁花襍木宜以畝計乃若庭除檻畔必以虬枝
古幹異種奇名枝葉扶踈位置踈密或水邊石際橫偃
斜披或一望成林或孤枝獨秀艸花不可繁雜隨處植
之取其四時不斷皆入圖畫又如桃李不可植於庭除

似宜遠望紅梅絳桃俱借以點綴林中不宜多植梅生
山中有苔蘚者移置藥欄最古杏花差不耐久開時多
值風雨僅可作片時玩蠟梅冬月最不可少他如豆棚
菜圃山家風味固自不惡然必闢隙地數頃別為一區
若於庭除種植便非韻事更有石礫木柱架縛精整者
愈入惡道至於執蘭栽菊古各有方時取以課園丁考
職事亦幽人之務也志花木第二

牡丹芍藥

牡丹稱花王芍藥稱花相俱花中貴商栽植賞玩不可
毫涉酸氣用文石為欄參差數級以次列種花時設燕
用木為架張碧油幔於上以蔽日色夜則懸燈以照忌
二種並列忌置木桶及盆盎中

玉蘭

宜種廳事前對列數株花時如玉圃瓊林最稱絕勝別
有一種紫者名木筆不堪與玉蘭作婢古人稱辛夷即
此花然輞川辛夷塢木蘭柴不應複名當是二種

海棠

昌州海棠有香今不可得其次西府為上貼梗次之垂絲又次之余以垂絲嬌媚真如妃子醉態較二種尤勝木瓜花似海棠故亦有木瓜海棠但木瓜花在葉先海棠花在葉後為差別耳別有一種曰秋海棠性喜陰濕宜種背陰階砌秋花中此為最艷亦宜多植

山茶

蜀茶滇茶俱貴黃者尤不易得人家多以配玉蘭以其

花同時而紅白爛然差俗又有一種名醉楊妃開向雪中更自可愛

桃

桃為仙木能制百鬼種之成林如入武陵桃源亦自有致第非盆盎及庭除物桃性早實十年輒枯故稱短命花碧桃人面桃差久較凡桃更美池邊宜多植若桃柳相間便俗

李

桃花如麗姝歌舞場中定不可少李如女道士宜置烟霞泉石間但不必多種耳別有一種名郁李子更美

杏

杏與朱李蟠桃皆堪鼎足花亦柔媚宜築一臺雜植數十本

梅

幽人花伴梅實專房取苔護蘚封枝稍古者移植石岩或庭際最古另種數畝花時坐卧其中令神骨俱清綠

萼更勝紅梅差俗更有虬枝屈曲置盆盎中者極奇蠟梅磬口為上荷花次之九英最下寒月庭際亦不可無

瑞香

相傳廬山有比丘晝寢夢中間花香寤而求得之故名睡香四方奇異謂花中祥瑞故又名瑞香別名麝囊又有一種金邊者人特重之枝既粗俗香復酷烈能損羣花稱為花賊信不虛也

薔薇木香

嘗見人家園林中必以竹為屏牽五色薔薇于上架木為軒名木香棚花時雜坐其下此何異酒食肆中然二種非屏架不堪植或移着閨閣供士女採掇差可別有一種名黃薔薇最貴花亦爛熳悅目更有野外叢生者名野薔薇香更濃郁可比玫瑰他如寶相金沙羅金鉢盂佛見笑七姊妹十姊妹刺桐月桂等花姿態相似種法亦同

玫瑰

玫瑰一名徘徊花以結為香囊芬氲不絕然實非幽人所宜佩歛條叢刺不甚雅觀花色亦微俗宜充食品不宜簪帶吳中有以畝計者花時獲利甚夥

紫荊棣棠

紫荊枝幹枯索花如綴珥形色香韻無一可者特以京兆一事為世所述以此嘉木余謂不如多種棣棠猶得風人之旨

葵花

葵花種類莫定初夏花繁葉茂最為可觀一曰戎葵奇態百出宜種曠處一曰錦葵其小如錢文采可玩宜種堦除一曰向日別名西番蓮最惡秋時一種葉如龍爪花作鵝黃者名秋葵最佳

罌粟

以重臺千葉者為佳然單葉者子必滿取供清味亦不惡藥欄中不可缺此一種

薇花

薇花四種紫色之外白色者曰白薇紅色者曰紅薇紫帶藍色者曰翠薇此花四月開九月歇俗稱百日紅山園植之可稱耐久朋然花但宜遠望北人呼猴郎達樹以樹無皮猴不能捷也其名亦奇

芙蓉

宜植池畔臨水為佳若他處植之絕無丰致有以靛紙蘸花蕊上仍裹其尖花開碧色以為佳此甚無謂

萱花

護草忌憂亦名宜男更可供食品巖間牆角最宜此種
又有金萱色淡黃香甚烈義興山谷遍滿吳中甚少他
如紫白蛺蝶春羅秋羅鹿葱洛陽石竹皆此花之附庸
也

薝蔔

一名越桃一名林蘭俗名梔子古稱禪友出自西域宜
種佛室中其花不宜近嗅有微細蟲入人鼻孔齋閣可
無種也

玉簪

潔白如玉有微香秋花中亦不惡但宜牆邊連種一帶
花時一望成雪若植盆石中最俗紫者名紫萼不佳

金錢

午開子落故名子午花長過尺許扶以竹箭乃不傾欹
種石畔尤可觀

藕花

藕花池塘最勝或種五色官缸供庭除賞玩猶可缸上

忌設小朱欄花亦當取異種如並頭重臺品字四面觀
音碧蓮金邊等乃佳白者藕勝紅者房勝不可種七石
酒缸及花缸內

水仙

水仙二種花高葉短單瓣者佳冬月宜多植但其性不
耐寒取極佳者移盆置几案間次者雜植松竹之下
或古梅奇石間更雅馮夷服花八石得為水仙其名最
雅六朝人乃呼為雅蒜大可軒渠

鳳仙

號金鳳花宋避李后諱改為好兒女花其種易生花葉俱無可觀更有以五色種子同納竹筒花開五色以為奇甚無謂花紅能染指甲然亦非美人所宜

茉莉素馨百合

夏夜最宜多置風輪一鼓滿室清芬章江編籬揀棘俱用茉莉花時千艘俱集虎丘故花市初夏最盛培養得法亦能隔歲發花第枝葉非凡案物不若夜合可供瓶

玩

杜鵑

花極爛熳性喜陰畏熱宜置樹下陰處花時移置几案間別有一種名映山紅宜種石岩之上又名羊躑躅

秋色

吳中稱雞冠雁來紅十樣錦之屬名秋色秋深雜彩爛然俱堪點綴然僅可植廣庭若幽牕多種便覺蕪雜鷄冠有矮腳者種亦奇

松

松柏古雖並稱然最高貴者必以松為首天目最上然
不易種取枯子松植堂前廣庭或廣臺之上不妨對偶
齋中宜植一株下用文石為臺或太湖石為欄俱可水
仙蘭蕙萱草之屬雜待其下山松宜植土岡之上龍鱗
既成濤水相應何減五株九里哉

木槿

花中最賤然古稱舜華其名最遠又名朝菌編籬野圻

不妨間植必稱林園佳友未之敢許也

桂

叢桂開時真稱香窟宜闢地二畝取各種並植結亭其中不得顏以天香小山等語更勿以他樹雜之樹下地平如掌潔不容唾花落地即取以充食品

柳

順插為楊倒插為柳更須臨池種之柔條拂水弄綠搓黃大有逸致且其種不生蟲蝨更可貴也西湖柳亦佳頗

涉脂粉氣白楊風楊俱不入品

黃楊

黃楊未必厄閨然實難長長丈餘者綠葉古株最可愛
玩不宜植盆盎中

芭蕉

綠牕分映但取短者為佳葉高則葉為風所碎耳冬月
有去梗以稻艸覆之者過三年即生花結甘露亦甚不
必又作盆玩者更可笑不如櫟櫚為雅且為塵尾蒲團

更適用也

槐榆

宜植門庭板扉綠映真如翠幄槐有一種天然膠屈枝
葉皆倒垂蒙密名盤槐亦可觀他如石楠冬青杉柏皆丘
壠間物非園林所尚也

梧桐

青桐有佳蔭株綠如翠玉宜種廣庭中當日令人洗拭
且取枝梗如畫者若直上而旁無他枝如拳如蓋及生

棉者皆所不取其子亦可點茶生於山岡者曰岡桐子
可作油

椿

椿樹高聳而枝葉踈與樗不異香曰椿臭曰樗圃中沿
牆宜多植以供食

銀杏

銀杏株葉扶踈新綠時最可愛吳中刹宇及舊家名園
大有合抱者新植似不必

烏白

秋晚葉紅可愛較楓樹更耐久茂林中有一株兩株不減石徑寒山也

竹

種竹宜築土為壠環水為谿小橋斜渡陟級而登上畱平臺以供坐臥科頭散髮儼如萬竹林中人也否則闢地數畝盡去雜樹四週石壘令稍高以石柱朱欄圍之竹下不畱纖塵片葉可席地而坐或畱石臺石櫬之屬

竹取長枝巨幹以毛竹為第一然宜山不宜城城中則
護基筭最佳竹不甚雅粉筋斑紫四種俱可燕竹最下
慈姥竹即桃枝竹不入品又有木竹黃籬竹箭竹方竹
黃金間碧玉觀音鳳尾金銀諸竹忌種花欄之上及庭
中平植一帶牆頭直立數竿至如小竹叢生曰瀟湘竹
宜於石巖小池之畔留植數枝亦有幽致種竹有疎種
密種淺種深種之法疎種謂三四尺地方種一窠欲其
土虛行鞭密種謂竹種雖疎然每窠卻種四五竿欲其

根密淺種謂種時入土不深深種為入土雖不深上以
田泥壅之如法無不茂盛又棕竹三等曰筋頭曰短柄
二種枝短葉垂堪植盆盞曰樸竹節稀葉硬全欠溫雅
但可作扇骨料及畫叉柄耳

菊

吳中菊盛時好事家必取數百本五色相間高下次列
以供賞玩此以誇富貴容則可若真能賞花者必覓異
種用古盆盞植一枝兩枝莖挺而秀葉密而肥至花發

時置几榻間坐卧把玩乃為得花之性情甘菊惟蕩口
有一種枝曲如偃蓋花密如鋪錦者最奇餘僅可收花
以供服食野菊宜著籬落間菊有六要二防之法謂
胎養土宜扶植雨暘修葺灌溉防蟲及雀作窠時必
來摘葉此皆園丁所宜知又非吾輩事也至如瓦料盆
及合兩瓦為盆者不如無花為愈矣

蘭

蘭出自閩中者為上葉如劍芒花高於葉離騷所謂秋

蘭子青青綠葉子紫莖者是也次則贛州者亦佳此
俱山齋所不可少然每處僅可置一盆多則類虎丘花
市盆盎須覓舊龍泉均州內府供春絕大者忌用花缸
牛腿諸俗製四時培植春日葉芽已發盆土已肥不可
沃肥水常以塵帚拂拭其葉勿令塵垢夏日花開葉嫩
勿以手搖動待其長茂然後拂拭秋則微撥開根土以
米泔水少許注根下勿漬污葉上冬則安頓向陽暖室
天晴無風昇出時時以盆轉動四面令勻午後即收入

勿令霜雪侵之若葉黑無花則陰多故也治蟻虱惟以大盆或缸盛水浸逼花盆則蟻自去又治葉蚤如白點以水一盆滴香油少許於內用綿蘸水拂拭亦自去矣此栽蘭簡便法也又有一種出杭州者曰杭蘭出陽羨山中者名興蘭一幹數花者曰蕙此皆可移植石巖之下須得彼中原本則歲歲發花珍珠風蘭俱不入品若蘭其葉如箬似蘭無馨艸花奇種金粟蘭名賽蘭香特甚

瓶花

堂供必高瓶大枝方快人意忌繁雜如縛忌花瘦於瓶
忌香煙燈煤燠觸忌油手拈弄忌井水貯瓶味鹹不宜
於花忌以插花水入口梅花秋海棠二種其毒尤甚冬
月入硫黃於瓶中則不凍

盆玩

盆玩時尚以列几案間者為第一列庭榭中者次之余
持論則反是最古者以天目松為第一高不過二尺短

不過尺許其本如臂其針若簇結為馬遠之歌斜詰曲
郭熙之露頂張拳劉松年之偃亞層疊盛子照之拖拽
軒翥等狀栽以佳器槎牙可觀又有古梅蒼蘚鱗皴苔
鬚垂滿含花吐葉歷久不敗者亦古若如時尚作沉香
片者甚無謂蓋木片生花有何趣味真所謂以耳食者
矣又有枸杞及水冬青野榆檜柏之屬根若龍蛇不露
束縛鋸截痕者俱高品也其次則閩之水竹杭之虎刺
尚在雅俗間乃若菖蒲九節神仙所珍見石則細見土

則粗極難培養吳人洗根澆水竹翦修淨謂朝取葉間
垂露可以潤眼意極珍之余謂此宜以石子鋪一小庭
遍種其上雨過青翠自然生香若盆中栽植列几案間
殊為無謂此與蟠桃雙果之類俱未敢隨俗作好也他
如春之蘭蕙夏之夜合黃香萱夾竹桃花秋之黃密矮
菊冬之短葉水仙及美人蕉諸種俱可隨時供玩盆以
青綠古銅白定官哥等窑為第一新製者五色內窑及
供春粗料可用餘不入品盆宜圓不宜方尤忌長狹石

以靈壁英石西山佐之餘亦不入品齋中亦僅可置一二盆不可多列小者忌架於朱几大者忌置於官磚得舊石欖或古石蓮磔為座乃佳

長物志卷二

欽定四庫全書

長物志卷三

明文震亨撰

水石

石令人古水令人遠園林水石最不可無要須迴環峭拔安插得宜一峯則太華千尋一勺則江湖萬里又須修竹老木怪藤醜樹交覆角立蒼崖碧澗奔泉汎流如入深巖絕壑之中乃為名區勝地約略其名匪一端矣

志水石第三

廣池

鑿池自畝以及頃愈廣愈勝最廣者中可置臺榭之屬
或長堤橫隔汀蒲圻葦雜植其中一望無際乃稱巨浸
若須華整以文石為岼朱欄迴逶忌中留土如俗名戰
魚墩或擬金焦之類池傍植垂柳忌桃杏間種中畜鳬
雁須十數為羣方有生意最廣處可置水閣必如圖畫
中者佳忌置簾舍於岼側植藕花削竹為闌勿令蔓衍
忌荷葉滿池不見水色

小池

階前石畔鑿一小池必須湖石四圍泉清可見底中畜
朱魚翠藻游泳可玩四周樹野藤細竹能掘地稍深引
泉脈者更佳忌方圓八角諸式

瀑布

山居引泉從高而下為瀑布稍易園林中欲作此須截
竹長短不一盡承簷溜暗接藏石罅中以斧劈石疊高
下鑿小池承水置石林立其下雨中能令飛泉瀆薄潺

溪有聲亦一奇也尤宜竹間松下青蔥掩映更自可觀
亦有蓄水於山頂客至去閘水從空直注者終不如雨
中承溜為雅蓋總屬人為此尤近自然耳

鑿井

井水味濁不可供烹煮然澆花洗竹滌硯拭几俱不可
缺鑿井須於竹樹之下深見泉脈上置轆轤引汲不則
蓋一小亭覆之石欄古號銀牀取舊製最大而古朴者
置其上井有神井傍可置頑石鑿一小龕遇歲時奠以

清泉一杯亦自有致

天泉

秋水 梅水次之秋水白而冽梅水白而甘春冬二

水春勝於冬蓋以和風甘雨故夏月暴雨不宜或因風
雷蛟龍所致最足傷人雪為五穀之精取以煎茶最為
幽況然新者有土氣稍陳乃佳承水用布於中庭受之
不可用簷溜

地泉

乳泉漫流如惠山泉為最勝次取清寒者泉不難於清而難於寒土多沙膩泥凝者必不清寒又有香而甘者然甘易而香難未有香而不甘者也瀑湧湍急者勿食食久令人有頭疾如廬山水簾天台瀑布以供耳目則可入水品則不宜溫泉下生硫黃亦非食品

流水

江水取去人遠者揚子南冷夾石渟淵特入首品河流通泉實者必須汲置候其澄澈亦可食

丹泉

名山大川仙翁修煉之處水中有丹其味異常能延年卻病此自然之丹液不易得也

品石

石以靈壁為上英石次之然二種品甚貴購之頗艱大者尤不易得高踰數尺者便屬奇品小者可置几案間色如漆聲如玉者最佳橫石以蠟地而峯巒峭拔者為上俗言靈壁無峯英石無坡以余所見亦不盡然他石

紋片粗大絕無曲折岼嶮森聳峻嶒者近更有以大塊辰砂石青石綠為研山盆石最俗

靈壁

出鳳陽府宿州靈壁縣在深山沙土中掘之乃見有細白紋如玉不起岩岫佳者如臥牛蟠螭種種異狀真奇品也

英石

出英州倒生岩下以鋸取之故底平起峯高有至三尺

及寸餘者小齋之前疊一小山最為清貴然道遠不易致

太湖石

石在水中者為貴歲久為波濤衝擊皆成空石面面玲瓏在山上者名旱石枯而不潤屢作彈窩若歷年歲久斧痕已盡亦為雅觀吳中所尚假山皆用此石又有小石久沉湖中漁人網得之與靈壁英石亦頗相類第聲不清響

堯峰石

近時始出苔蘚叢生古朴可愛以未經採鑿山中甚多
但不玲瓏耳然政以不玲瓏故佳

崑山石

出崑山馬鞍山下生於山中掘之乃得以色白者為貴
有鷄骨片胡桃塊二種然亦俗尚非雅物也間有高七
八尺者置之高大石盆中亦可此山皆火石火氣暖故
栽菖蒲等物於上最茂惟不可置几案及盆盎中

錦川將樂羊肚

石品惟此三種最下錦川尤惡每見人家石假山輒置
數峯于上不知何味斧劈以大而頑者為雅若直立一
片亦最可厭

土瑪瑙

出山東兗州府沂州花紋如瑪瑙紅多而細潤者佳有
紅絲石白地上有赤紅紋有竹葉瑪瑙花斑與竹葉相
類故名此俱可鋸板嵌几榻屏風之類非貴品也石子

五色或大如拳或小如豆中有禽魚鳥獸人物方勝回紋之形置青綠小盆或宣窑白盆內班然可玩其價甚貴亦不易得然齋中不可多置近見人家環列數盆竟如賈肆新都人有名醉石齋者聞其藏石甚富且奇其地溪澗中另有純紅純綠者亦可愛玩

大理石

出滇中白若玉黑若墨為貴白微帶青黑微帶灰者皆下品但得舊石天成山水雲烟如米家山此為無上佳

品古人以鑲屏風近始作几榻終為非古近京口一種與大理相似但花色不清石藥填之為山雲泉石亦可得高價然真偽亦易辨真者更以舊為貴

永石

即祁陽石出楚中石不堅色好者有山水日月人物之象紫花者稍勝然多是刀刮成非自然者以手摸之凹凸者可驗大者以製屏亦雅

長物志卷三

欽定四庫全書

長物志卷四

明文震亨撰

禽魚

語鳥拂閣以低飛游魚排行而徑度幽人會心輒令竟日忘倦顧聲音顏色飲啄態度遠而巢居穴處眠沙泳浦戲廣浮深近而穿屋賀厦知歲司晨啼春噪晚者品類不可勝紀丹林綠水豈令凡俗之品闌入其中故必疏其雅潔可供清玩者數種令童子愛養餌飼得其性

情庶幾馴鳥雀狎鳬魚亦山林之經濟也志禽魚第四

鶴

華亭鶴窠村所出其體高俊綠足龜文最為可愛江陵
鶴津維揚俱有之相鶴但取標格奇俊喉聲清亮頸欲
細而長足欲瘦而節身欲人立背欲直削蓄之者當築
廣臺或高岡土壠之上居以茅菴隣以池沼飼以魚穀
欲教以舞俟其飢置食於空野使童子拊掌頓足以誘
之習之既熟一聞拊掌即便起舞謂之食化空林別墅

白石青松惟此君最宜其餘羽族俱未入品

鸕鶿

鸕鶿能刺水故水族不能害蓄之者宜於廣池巨浸十數為羣翠毛朱喙燦然水中他如烏喙白鴨亦可蓄一二以代鵝羣曲欄垂柳之下游泳可玩

鸚鵡

鸚鵡能言然須教以小詩及韻語不可令聞市井鄙俚之談聒然盈耳銅架食缸俱須精巧然此鳥及錦鷄孔

雀倒挂吐綬諸種皆斷為閨閣中物非幽人所需也

百舌畫眉鸚鵡

飼養馴熟絳蠻軟語百種雜出俱極可聽然亦非幽齋
所宜或於曲廊之下雕籠畫檻點綴景色則可吳中最
尚此鳥余謂有禽癖者當覓茂林高樹聽其自然弄聲
尤覺可愛更有小鳥名黃頭好鬬形既不俗尤屬無譚
朱魚

朱魚獨盛吳中以色如辰州朱砂故名此種最宜盆蓄

有紅而帶黃色者僅可點綴陂池

魚類

初尚純紅純白繼尚金盃金鞍錦被及印頭紅裏頭紅
連腮紅首尾紅鶴頂紅繼又尚墨眼雪眼硃眼紫眼瑪
瑙眼琥珀眼金管銀管時尚極以為貴又有堆金砌玉
落花流水蓮臺八瓣隔斷紅塵玉帶圍梅花片波浪紋
七星紋種種變態難以盡述然亦隨意定名無定式也

藍魚白魚

藍如翠白如雪迫而視之腸胃俱見此即朱魚別種亦貴甚

魚尾

自二尾以至九尾皆有之第美鍾於尾身材未必佳蓋魚身必洪纖合度骨肉停勻花色鮮明方入格

觀魚

宜早起日未出時不論陂池盆盎魚皆蕩漾於清泉碧沼之間又宜涼天夜月倒影揀波時時驚鱗潑刺耳目

為醒至如微風披拂琮琤成韻雨過新漲縠紋皺綠皆
觀魚之佳境也

吸水

盆中換水一兩日即底積垢膩宜用湘竹一段作吸水
筒吸去之倘過時不吸色便不鮮美故佳魚池中斷不
可蓄

水缸

有古銅缸大可容二石青綠四裏古人不知何用當是

穴中注油點燈之物今取以蓄魚最古其次以五色內
府官窑瓷州所燒純白者亦可用惟不可用宜興所燒
花缸及七石牛腿諸俗式余所以列此者實以備清玩
一種若必按圖而索亦為板俗

長物志卷四

欽定四庫全書

長物志卷五

明文震亨撰

書畫

金生於山珠產於淵取之不窮猶為天下所珍惜況圖畫在宇宙歲月既久名人藝士不能復生可不珍秘寶愛一入俗子之手動見勞辱卷舒失所操揉燥裂真書畫之厄也故有收藏而未能識鑒識鑒而不善閱玩閱玩而不能裝褫裝褫而不能銓次皆非能真蓄書畫者

又蓄聚既多妍蚩混雜甲乙次第毫不可訛若使真贋並陳新舊錯出如入賈胡肆中有何趣味所藏必有晉唐宋元名蹟乃稱博古若徒取近代紙墨較量真偽心無真賞以耳為目手執卷軸口論貴賤真惡道也志書畫第五

論書

觀古法書當澄心定慮先觀用筆結體精神照應次觀人為天巧自然強作次考古今跋尾相傳來歷次辨收

藏印識紙色絹素或得結構而不得鋒鉞者模本也得
筆意而不得位置者臨本也筆勢不聯屬字形如算子
者集書也形跡雖存而真彩神氣索然者雙鉤也又古
人用墨無論燥潤肥瘦俱透入紙素後人偽作墨浮而
易辯

論畫

山水第一竹樹蘭石次之人物鳥獸樓殿屋木小者次
之大者又次之人物顧盼語言花果迎風帶露鳥獸蟲

魚精神逼真山水林泉清閒幽曠屋廬深邃橋約往來
石老而潤水淡而明山勢崔嵬泉流灑落雲烟出沒野
逕迂回松偃龍蛇竹藏風雨山腳入水澄清水源來歷
分曉有此數端雖不知名定是妙手若人物如尸如塑
花果類粉捏雕刺蟲魚鳥獸但取皮毛山水林泉布置
迫塞樓閣模糊錯雜橋約强作斷形徑無夷險路無出
入石止一面樹少四枝或高大不稱或遠近不分或濃
淡失宜點染無法或山脚無水面水源無來歷雖有名

款定是俗筆為後人填寫至於臨摹履手落墨設色自然不古不難辨也

書畫價

書價以正書為標準如右軍草書一百字乃敵一行行書三行行書敵一行正書至於樂毅黃庭畫贊告誓但得成篇不可計以字數畫價亦然山水竹石古名賢象可當正書人物花鳥小者可當行書人物大者及神圖佛象宮室樓閣走獸蟲魚可當草書若夫臺閣標功臣之

烈宮殿彰貞節之名妙將入神靈則通聖開厨或失挂
壁欲飛但涉奇事異名即為無價國寶又書畫原為雅
道一作牛鬼蛇神不可詰識無論古今名手俱落第二
古今優劣

書學必以時代為限六朝不及晉魏宋元不及六朝與
唐畫則不然佛道人物仕女牛馬近不及古山水林石
花竹禽魚古不及近如顧凱之陸探微張僧繇吳道玄
及閻立德立本皆純重雅正性出天然周昉韓幹戴嵩

氣韻骨法皆出意表後之學者終莫能及至如李成關
仝范寬董源徐熙黃筌居宋二米勝國松雪太癡元鎮
叔明諸公近代唐沈及吾家太史和州輩皆不藉師資
窮工極致借使二李復生邊鸞再出亦何以措手其間
故蓄書必遠求上古蓄畫始自顧陸張吳下至嘉隆名
筆皆有奇觀惟近時點染諸公則未敢輕議

粉本

古人畫藁謂之粉本前輩多寶蓄之蓋其草草不經意

處有自然之妙宣和紹興所藏粉本多有神妙者

賞鑒

看書畫如對美人不可毫涉粗浮之氣蓋古畫紙絹皆
脆舒卷不得法最易損壞尤不可近風日燈下不可看
畫恐落煤燼及為燭淚所污飯後醉餘欲觀卷軸須以
淨水滌手展玩之際不可以指甲剔損諸如此類不可
枚舉然必欲事事勿犯又恐涉強作清態惟遇真能賞
鑒及閱古甚富者方可與談若對儻父輩惟有珍秘不

出耳

絹素

古畫絹色墨氣自有一種古香可愛惟佛像有香烟熏黑多是上下二色偽作者其色黃而不精采古絹自然破者必有鯽魚口須連三四絲偽作則直裂唐絹絲粗而厚或有搗熟者有獨梭絹濶四尺餘者五代絹極粗如布宋有院絹勻淨厚密亦有獨梭絹濶五尺餘細密如紙者元絹及國朝內府絹俱與宋絹同勝國時有密

機絹松雪子昭畫多用此蓋出嘉興府宓家以絹得名
今此地尚有佳者近董太史筆多用研光白綾未免有
進賢氣

御府書畫

宋徽宗御府所藏書畫俱是御書標題後用宣和年號
玉瓢御寶記之題畫書於引首一條濶僅指大倚有木
印黑字一行俱裝池匠花押名款然亦真偽相雜蓋當
時名手臨摹之作皆題為真蹟至明昌所題更多然今

人得之亦可謂買王得羊矣

院畫

宗畫院衆工凡作一畫必先呈稿本然後上真所畫山水人物花木鳥獸皆是無名者今國朝內畫水陸及佛像亦然金碧輝燦亦奇物也今人見無名人畫輒以形似填寫名款覓高價如見牛必戴嵩見馬必韓幹之類皆為可笑

單條

宋元古畫斷無此式蓋今時俗制而人絕好之齋中懸挂俗氣逼人眉睫即果真蹟亦當減價

名家

書畫名家收藏不可錯雜大者懸挂齋壁小者則為卷冊置几案間邃古篆籀如鍾張衛索顏陸張吳及歷代不甚著名者不能具論書則右軍大令智永虞永興褚河南歐陽率更唐玄宗懷素顏魯公柳誠懸張長史李懷琳宋高宗李建中二蘇二米范文正黃魯直蔡忠惠

蘇滄浪薛紹彭黃長睿薛道祖范文穆張卽之先信國
趙吳興鮮于伯機康里子山張伯雨倪元鎮俞紫芝楊
鐵厓柯丹丘袁清容危太素我朝則宋文憲瀛中書舍
人燧方遜志孝孺宋南宮克沈學士度俞紫芝和徐武
功有貞金元玉珏沈大理梁解學士大紳錢文通桑柳
州悅祝京兆允明吳文定寬先太史諱王太學寵李太
業應禎王文恪鰲唐解元寅顧尚書璘豐考功坊先兩
博士諱王吏部穀祥陸文裕深彭孔嘉年陸尚寶師道

陳方伯鑒蔡孔目羽陳山人淳張孝廉鳳翼王徵君穉
登周山人天球邢侍御侗董太史其昌又如陳文東壁
姜中書立剛雖不能洗院氣而亦錚錚有名者盡則王
右丞李思訓父子周昉董北海李營丘郭河陽米南宮
宋徽宗米元暉崔白黃筌居冢文與可李伯時郭忠恕
董仲翔蘇文忠蘇叔黨王晉卿張舜民楊補之楊季衡
陳容李唐馬遠馬逵夏珪范寬關仝荆浩李山趙松雪
管仲姬趙仲穆趙千里李息齋吳仲圭錢舜舉盛子昭

陳珏陳仲美陸天游曹雲西唐子華王元章高士安高克恭王叔明黃子久倪元鎮柯丹丘方方壺戴文進王孟端夏太常趙善長陳惟允徐幼文張來儀宋南宮周東村沈貞吉恒吉沈石田杜東原劉完菴先太史先和州五峯唐解元張夢晉周官謝時臣陳道復仇十洲錢叔寶陸叔平皆名筆不可缺者他非所宜蓄即有之亦不當出以示人又如鄭顛仙張復陽鍾欽禮蔣三松張平山汪海雲皆畫中邪學尤非所尚

宋綉宋刻絲

宋繡針線細密設色精妙光彩射目山水分遠近之趣樓閣得深邃之體人物具瞻眺生動之情花鳥極綽約嚙啞之態不可不蓄一二幅以備畫中一種

裝潢

裝潢書畫秋為上時春為中時夏為下時暑濕及沍寒俱不可裝裱勿以熟紙背必皺起宜用白滑漫薄大幅生紙紙縫先避人面及接處若縫縫相接則卷舒緩急

有損必令參差其縫則氣力均平太硬則強急太薄則
失力絹素彩色重者不可擣理古畫有積年塵埃用皂
莢清水數宿托於太平案扞去盡復鮮明色亦不落補
綴之法以油紙襯之直其邊際密其隙縫正其經緯就
其形制拾其遺脫厚薄均調潤潔平穩又凡書畫法帖
不脫落不宜數裝背一裝背則一損精神古紙厚者必
不可揭薄

法糊

用瓦盆盛水以麵一斤滲水上任其浮沉夏五日冬十日以臭為度後用清水蘸白芨半兩白礬三分去滓和元浸麪打成鍋內打成團另換水煮熟去水傾置一器候冷日換水浸臨用以湯調開忌用濃糊及敝帚

褰褌定式

上下天地須用皂綾龍鳳雲鶴等樣不可用團花及蔥白月白二色二垂帶用白綾濶一寸許烏絲粗界畫二條玉池白綾亦用前花樣書畫小者須空嵌用淡月白

畫絹上嵌金黃綾條濶半寸許蓋宣和裱法用以題識
旁用沉香皮條邊大者四面用白綾或單用皮條邊亦
可叅書有舊人題跋不宜剪削無題跋則斷不可用畫
卷有高頭者不須嵌不則亦以細畫絹空嵌引首須用
宋經箋白宋箋及宋元金花箋或高麗繭紙日本畫紙
俱可大幅上引首五寸下引首四寸小全幅上引首四
寸下引首三寸上標除撇竹外淨二尺下標除軸淨一
尺五寸橫卷長二尺者引首濶五寸前標濶一尺餘俱

以是為率

標軸

古人有鏤沉檀為軸身以果金鑲金白玉水晶琥珀瑪
瑙雜寶為飾貴重可觀蓋白檀香潔去蟲取以為身鼉
有深意今既不能如舊製只以杉木為身用犀象角三
種雕如舊式不可用紫檀花梨法藍諸俗製畫卷須出
軸形製既小不妨以寶玉為之斷不可用平軸籤以犀
玉為之曾見宋玉籤半嵌錦帶內者最奇

裱錦

古有樗蒲錦樓閣錦紫駝花鸞章錦朱雀錦鳳皇錦走
龍錦翻鴻錦皆御府中物有海馬錦龜紋錦粟地錦皮
毬錦皆宣和綾及宋繡花鳥山水為裱池卷首最古今
所尚落花流水錦亦可用惟不可用宋段及紵絹等物
帶用錦帶亦有宋織者

藏畫

以杉杪木為匣匣內切勿油漆糊紙恐惹霉濕四五月

先將畫幅展看微見日色收起入匣去地丈餘庶免
徽白平時張挂須三五日一易則不厭觀不惹塵濕收
起時先拂去兩面塵垢則質地不損

小畫匣

短軸作橫面開門匣畫直放入軸頭貼籤標寫其書其
畫甚便取省

捲畫

須顧邊齊不宜局促不可太寬不可着力捲緊恐急裂

絹素拭抹用軟絹細細拂之不可以手托起盡軸就觀多致損裂

法帖

歷代名家碑刻當以淳化閣帖壓卷侍書王著勒未有篆題者是蔡京奉旨摹者曰太清樓帖僧希白所摹者曰潭帖尚書郎潘思旦所摹者曰絳帖王宗輔道守汝州所刻者曰汝帖宋許提舉刻于臨江者曰二王帖元祐中刻者曰祕閣續帖淳熙年刻者曰修內司本高宗

訪求遺書於淳熙閣摹刻者曰淳熙祕閣續帖后主命
徐鉉勒石在淳化之前者曰昇元帖劉次莊摹閣帖除
去篆題年月而增入釋文者曰戲魚堂帖武岡軍重摹
絳帖曰武岡帖上蔡人臨摹絳帖曰蔡州帖趙彥約于
南康所刻曰星鳳樓帖廬江李氏刻曰甲秀堂帖黔人
秦世章所刻曰黔江帖泉州重摹閣帖曰泉帖韓平原
所刻曰羣玉堂帖薛紹彭所刻曰家塾帖曹之格曰新
所刻曰寶晉齋帖王庭筠所刻曰雪谿堂帖周府所刻

曰東書堂帖吾家所刻曰停雲館帖小停雲帖華氏刻
曰真賞齋帖皆帖中名刻摹勒皆精又如歷代名帖收
藏不可缺者周秦漢則史籀篆石鼓文壇山石刻李斯
篆泰山胸山嶧山諸碑秦誓詛楚文章帝艸書帖蔡邕
淳于長夏承碑郭有道碑九疑山碑邊韶碑宣父碑北
岳碑崔子玉張平子墓碑郭香察隸西岳華山碑魏帖
則元常賀捷表大饗碑薦季直表受禪碑上尊號碑宗
聖侯碑劉玄州華岳碑吳帖則國山碑延陵季子二碑

晉帖則蘭亭記筆陣圖黃庭經聖教序樂毅論周府君
碑東方朔贊洛神賦曹娥碑告墓文攝山寺碑裴雄碑
興福寺碑宣示帖平西將軍墓銘梁忠楚碑羊祜峴山
碑宋齊梁陳帖則宋文帝神道碑齊倪桂金庭觀碑齊
南陽寺隸書碑梁茅君碑瘞鶴銘劉靈正墮淚碑魏齊
周帖則有魏裴思順教戒經北齊王思誠八分茅山碑
後周大宗伯唐景碑蕭子雲章州出師頌天柱山銘隋
帖則有開皇蘭亭薛道衡書朱厰碑舍利塔銘龍藏寺

碑智永真行二體千文草書蘭亭唐帖歐書則九成宮
銘房定公墓碑化度寺碑皇甫君碑虞恭公碑真書千
文小楷心經夢奠帖金蘭帖虞書則夫子廟堂碑破邪
論寶曇塔銘陰聖道場碑汝南公主銘孟法師碑褚書
則樂毅論哀冊文忠臣像贊龍馬圖贊臨摹蘭亭臨
摹聖教陰符經度人經紫陽觀碑柳書則金剛經玄秘塔
銘顏書則爭坐位帖麻姑仙壇二祭文家廟碑元次山
碑多寶寺碑放生池碑射堂記北岳廟碑艸書千文磨

崖碑干祿字帖懷素書則自序三種艸書千文聖母帖
藏真律公二帖李北海書則陰符經娑羅樹碑曹娥碑
秦望山碑臧懷亮碑有道先生葉公碑岳麓寺碑開元
寺碑荆門行雲庵將軍碑李思訓碑戒壇碑太宗書魏
徵碑屏風帖李勣碑玄宗一行禪師塔銘孝經金仙公
主碑孫過庭書譜索靖出師表柳公綽諸葛廟堂碑李
陽冰篆書千文城隍廟碑孔子廟碑歐陽通道因禪師
碑薛稷昇仙太子碑張旭艸書千文僧行敦遺教經宋

則蘇米諸公如洋州園池天馬賦等類元則趙松雪國朝則二宋諸公所書佳者亦當兼收以供賞鑒不必太雜

南北紙墨

古之北紙其紋橫質鬆而厚不受墨北墨色青而淺不和油蠟故色澹而紋皺謂之蟬翅搨南紙其紋豎用油蠟故色純黑而有浮光謂之烏金搨

古今帖辨

古帖歷年久而裱數多其墨濃者堅若生漆紙面光彩如研並無沁墨水跡侵染且有一種異馨發自紙墨之外

裱帖

古帖宜以文本薄一分許為板面上刻碑額卷數次則用厚紙五分許以古色錦或青花白地錦為面不可用綾及雜彩色更須製匣以藏之宜少方濶不可狹長濶狹不等以白鹿紙廂邊不可用絹十冊為匣大小如一

式乃佳

宋板

藏書貴宋刻大都書寫肥瘦有則佳者有歐柳筆法紙質勻潔墨色清潤至於格用單邊字多諱筆雖辨証之一端然非考據要訣也書以班范二書左傳國語老莊史記文選諸子為第一名家詩文雜記道釋等書次之紙白板新綿紙者為上竹紙活襯者亦可觀糊背批點不蓄可也

懸畫月令

歲朝宜宋畫福神及古名賢像元宵前後宜看燈傀儡
正二月宜春遊仕女梅杏山茶玉蘭桃李之屬三月三
日宜宋畫真武像清明前後宜牡丹芍藥四月八日宜
宋元人畫佛及宋繡佛像十四日宜宋畫純陽像端五宜
真人玉符及宋元名筆端陽景龍舟艾虎五毒之類六
月宜宋元大樓閣大幅山水蒙密樹石大幅雲山採蓮
避暑等圖七夕宜穿鍼乞巧天孫織女樓閣芭蕉仕女

等圖八月宜古桂或天香書屋等圖九十月宜菊花芙蓉秋江秋山楓林等圖十一月宜雪景蠟梅水仙醉楊妃等圖十二月宜鍾馗迎福驅魅嫁魅臘月廿五宜玉帝五色雲車等圖至如移家則有葛仙移居等圖稱壽則有院畫壽星王母等圖祈晴則有東君祈雨則有古畫風雨神龍春雷起蟄等圖立春則有東皇太乙等圖皆隨時懸挂以見歲時節序若大幅神圖及杏花燕子紙帳梅過牆梅松柏鶴鹿壽意之類一落俗套斷不宜

懸至如宋元小景枯木竹石四幅大景又不當以時序
論也

長物志卷五

欽定四庫全書

長物志卷六

明文震亨撰

几榻

古人製几榻雖長短廣狹不齊置之齋室必古雅可愛
又坐臥依憑無不便適燕衍之暇以之展經史閱書畫
陳鼎彝羅有核施枕簟何施不可令人製作徒取雕繪
文飾以悅俗眼而古制蕩然令人慨歎實深志几榻第
六

榻

坐高一尺二寸屏高一尺三寸長七尺有奇橫一尺五寸周設木格中實湘竹下座不虛三面靠背後背與兩傍等此榻之定式也有古斷紋者有元螺鈿者其製自然古雅忌有四足或為螳螂腿下承以板則可近有大理石鑲者有退光朱黑漆中刻竹樹以粉填者有新螺鈿者大非雅器他如花楠紫檀烏木花梨照舊式制成俱可用一改長大諸式雖曰美觀俱落俗套更見元製

榻有長丈五尺濶二尺餘上無屏者蓋古人連牀夜臥臥以足抵足其製亦古然今卻不適用

短榻

高尺許長四尺置之佛堂書齋可以習靜坐禪談玄揮麈更便斜倚俗名彌勒榻

几

以怪樹天生屈曲若環若帶之半者為之橫生三足出自天然摩弄滑澤置之榻上或蒲團可倚手頓顙又見

圖畫中有古人架足而臥者製亦奇古

禪椅

以天台藤為之或得古樹根如虬龍詰曲臃腫槎牙四出可挂瓢笠及數珠瓶鉢等器更須瑩滑如玉不露斧斤者為佳近見有以五色芝粘其上者頗為添足

天然几

以文木如花梨鐵梨香楠等木為之第以濶大為貴長不可過八尺厚不可過五寸飛角處不可太尖須平圓

乃古式照倭几下有拖尾者更奇不可用四足如書卓
式或以古樹根承之不則用木如臺面濶厚者空其中
略彫雲頭如意之類不可雕龍鳳花草諸俗式近時所
製狹而長者最可厭

書卓

中心取濶大四週廂邊濶僅半寸許足稍矮而細則其
製自古凡狹長混角諸俗式俱不可用漆者尤俗

辟卓

長短不拘但不可過濶飛雲起角螳螂足諸式俱可供
佛或用大理及祁陽石鑲者出舊製亦可

方卓

舊漆者最多須取極方大古朴列坐可十數人者以供
展玩書畫若近製八仙等式僅可供宴集非雅器也燕
几別有譜圖

臺几

倭人所製種類大小不一俱極古雅精麗有鍍金鑲四

角者有嵌金銀片者有暗花者價俱甚貴近時倣舊式為之亦有佳者以置尊彝之屬最古若紅漆狹小三角諸式俱不可用

椅

椅之製最多曾見元螺鈿椅大可容二人其製最古為木鑲大理石者最稱貴重然亦須照古式為之總之宜矮不宜高宜濶不宜狹其摺疊單靠吳江竹椅專諸禪椅諸俗式斷不可用踏足處須以竹鑲之庶歷久不

壞

杌

杌有二式方者四面平等長者亦可容二人並坐圓杌須大四足堀出古亦有螺鈿朱黑漆者竹杌及緇環諸俗式不可用

櫈

櫈亦用狹邊廂者為雅以川柏為心以烏木廂之最古不則竟用雜木黑漆者亦可用

交牀

即古胡牀之式兩都有嵌銀銀鉸釘圓木者携以山遊或舟中用之最便金漆摺疊者俗不堪用

櫥

藏書櫥須可容萬卷愈濶愈古惟深僅可容一冊即濶至丈餘門必用二扇不可用四及六小櫥以有座者為雅四足者差俗即用足亦必高尺餘下用櫥殿僅宜二尺不則兩櫥疊置矣櫥殿以空如一架者為雅小櫥有

方二尺餘者以置古銅玉小器為宜大者用杉木為之
可辟蟲小者以湘妃竹及豆瓣楠赤水擺古黑漆斷紋
者為甲品雜木亦俱可用但式貴去俗耳鉸釘忌用白
銅以紫銅照舊式兩頭尖如梭子不用釘釘者為佳竹
櫥及小木直楞一則市肆中物一則藥室中物俱不可
用小者有內府填漆有日本所製皆奇品也經櫥用朱
漆式稍方以經冊多長耳

架

書架有大小二式大者高七尺餘濶倍之上設十二格
每格僅可容書十冊以便檢取下格不可置書以近地
卑濕故也足亦當稍高小者可置几上二格平頭方木
竹架及朱黑漆者俱不堪用

佛廚佛卓

用朱黑漆須極華整而無脂粉氣有內府雕花者有古
漆斷紋者有日本製者俱自然古雅近有以斷紋器湊
成者若製作不俗亦自可用若新漆八角委角及建密

佛像斷不可用也

床

以宋元斷紋小漆牀為第一次則內府所製獨眠牀又次則小木出高手匠作者亦自可用永嘉粵東有摺疊者舟中携置亦便若竹牀及飄簷拔步彩漆卍字回紋等式俱俗近有以栢木琢細如竹者甚精宜閨閣及小齋中

廂

倭廂黑漆嵌金銀片大者盈尺其鉸釘鎖鑰俱奇巧絕倫以置古玉重器或晉唐小卷最宜又有一種差大式亦古雅作方勝纓絡等花者其輕如紙亦可置卷軸香藥雜玩齋中宜多畜以備用又有一種古斷紋者上員下方乃古人經廂以置佛坐間亦不俗

屏

屏風之制最古以大理石鑲下座精細者為貴次則祁陽石又次則花藥石不得舊者亦須倣舊式為之若紙

糊及圍屏木屏俱不入品

腳凳

以木製滾凳長二尺濶六寸高如常式中分一鐺內二
空中車圓木二根兩頭留軸轉動以腳踣軸滾動往來
蓋湧泉穴精氣所生以運動為妙竹踏凳方而大者亦
可用古琴磚有狹小者夏月用作踏凳甚涼

長物志卷六